



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3 Yangia anidakangma : f Tir Yimiyim


Instagram tir_yimiyim

YouTube tir yimiyim

TAPAK 8

TMC-i Delhi election nung tokteptsü: Mamata

Taoba mapang Chelsea nungi asayar Oscar asaya nungi anener



VOL. XXIII ISSUE NO. 172 (ADOK 172) DIMAPUR TENTONÜ (MONDAY) RONGCHII (APRIL) 06, 2026

₹ 5.00

NPF-i Naga nunger ajunga lung-jemtsü atema inyaker: CM Rio



Dr. Neiphu Rio

Dimapur, Rongchii/April 05 (TYO): Honibarnü Chiephobozou nung Naga People's Front (NPF) shisadokden senden ka nung jembidang, party-i Naga nunger tajangzük, maitsü aser sobaliba wazüka ayutsü atema inyaker, ta Nagaland Chief Minister Dr. Neiphu Rio-i ashi.

Naga nunger temang shi melungjemi lir saka party-i arütsü alema oa aliba "political integration" atema inyaksü temlungtetba nung lir, ta NPF tiri ashi.

NPF ya Naga nunger puti otsü nung tera yanga lir ta ashi aser nüburtem indang sobaliba aser yimtenren nung kibur ka ama shia liasü.

NPF-i Naga nunger puti otsü kanga junga meteta lir aser nübur tenzüksü lenir tajung aika

adokdaksüogo, ta pai ashi aser party züngsemtem dang lokti tashi itshitsü aser Naga nunger tejakleni aotsü atema külemi inyaksü ayongzüka liasü.

Naga political issue bentetba nung terenlok kanga atsü-ayonga aliba tebilemstü lemsatepdang, Rio-i Naga underground groups aser Government of India tsüngta agreements tem zülutepba mapa kuma inyaka maoba indang aitsü.

"Agreements aika zülutepogo, saka kata mapa kuma mamshir. Ibai memelenshi tashi tangatetep kati marutsü," ta ashi.

Senden nung NPF secretary general aser MLA Achumbemo Kikon-i party-i grassroots nung inyakba indang lemsatepdang, Naga nunger maitsü wazüka ayutsü nükjidong nung inyaker aser yimtenren tensa melenshiba ajanga nüburtem anir, ta ashi.

Tesüiba küm 60 shi NPF-i tongti shilem agia arur aser Naga political tebilemstü ajak densema aser ajaki akumtsüboa agizüksüsa inyaka arutar, ta pai ashi.

Agreement tem mapa kuma inyaksü asoshi mera tejangja agiba aser Naga nungeri aginüba ama inyakba ajanga terenlok tajung alitsü, ta Kikon-i ashi.

Nagaland foothills road mechi mangatetep tuluba akumer

Dimapur, Rongchii/April 05 (TYO): Nagaland Foothills Road Coordination Committee (NFHRCC) ajanga kin balala lokti tentet tem dang Nagaland sorkari National Highways Act 1956 aser Nagaland Foothills Road agitsü atema April 7, 2026 nü senden amentsü aliba dak sendakba nung March 30, 2026 nü telemtetba agia aliba ama ajang-ajanga nokdaksü ayongzüka liasü.

HOHOs kari danga HOHOS tem külemi telemtetba agia aliba nung aibelenra ibaji 'anti-developmental' aser Nagaland Historical People's Road project nung tesülen nungi kotari agi atsüngba mapa ka ama züngshitsü, ta NFHRCC sangdong ka ajanga ashi.

Dimapur nung aliba Tribal HOHOs temi March 31, 2026 ya anogo tatem asütsü Nagaland sorkar dangi February 21, 2026 nü takhangba agüja liasü. Iba sülen sorkari senden ya March 31, 2026 nü amentsü lemtet aser Apex Tribal HOHOs ajunga iba senden nung jaok, ta ashi.

Parnoki ang kuli tajungba meteta alitsü, saka March 31 senden ya April 7, 2026 nü amentsü thina liasü. Iba sülen Dimapur nung aliba HOHOs den külemi Apex Tribal HOHOs temi iba April 7 senden nung NFHRCC

mejaokra parnoka shilem magitsü ta pangzüng ka renema liasü.

Ajisüaka sorkari tang tashi April 7 senden nung NFHRCC jaokba mali aser 2nd Phase World Order agütsütsü atema ojang kata jembia mali. Anungji iba "People's Project" wazüka ayutsü atema yimya balala nung longkak aittsü HOHOs aser Committee kanga junga renema lir, ta NFHRCC sangdong ajanga ashi.

Department-i M/S JK Construction aser M/S Chabou & Co den mapa ya December 2025 tashinung renemtsü Contract Agreement zülutepa lir, ajisüaka osangtsüsang tongtepratepba nung metokmeperi aliba yong kasa mapa March 2026 tashi Minister G. Kaito Aye-i atsülangtsü, ta ashi.

Ano kasa mapaji April 30, 2026 tashi atsülangshitsü, koba kuli tajung masü aser tim masü. M/S JK Construction aser M/S Chabou & Co nem mapa inyaksü atema work orders agütsüba ashi mapang atsülangtsü atema work orders agütsüba masü. Anungji M/S JK Construction aser M/S Chabou & Co yagi atsülangtsüba ama April 30, 2026 tashinung mapa merenemra, firms anaprong ya blacklist asütsüla aser mapa ya temsüa aliba firms kar nem agütsütsüla. Tajangzük

agir kar mechi Naga nunger dangar memenepi malitsü, ta ashi.


Committee-i mapa nung temulung masüba indanga lemsatep aser DPR renemba nunga meshidak inyakba sayua Hume pipes aser nungdakba ama Slap Culverts peria aser shidak inoka maliba kuli tejangja lir, anungji Department-i tanüngba projects tem nung süoki ia inyaksüla ta ashi.

Committee-i NPWD, Road & Bridge dang Baghty aser Peren Divisions nung mapa tekeraba nung tembangdaksütsü mechi tekeraba nung steel structures agütsütsü ayongzüka liasü.

Parnoki tang "Opposition" maliba sorkari Nagaland Foothills Road Project dak sendakba nung SASCI loan component amshiba nung shidak meinyakba asoshi jashiba lemsatep aser tia maka Nagaland nung aliba nüburtemi mepelar ta ashi.

Anungji Dimapur nung aliba Tribal HOHOs ajunga aser Naga Council Dimapur densema tribal bodies shia nungi teshimtet core team members tem telungjem shisadokden senden ka NFHRCC Base Office, Kher Mahal, Dimapur nung April 6, 2026 anepdang 10:00 ako nung amentsü, ta sangdong ajangasa ashi.

Assam sülen NHIDCL projects timtiba Nagaland angur



Dimapur, Rongchii/April 05 (TYO): Northeast nung National Highways tasazük 16,207 kilometers shi agencies pezü - state PWDs, BRO, NHAI aser NHIDCL ajanga yanglur aser anepalur.

Iba lenmang tasazük kilometers 16,207 nungi kilometers 6,836 shi NHIDCL kübok lir, kilometers 7,069 shi state sorkar tem kübok lir, NHAI kübok kilometers 778, BRO kübok kilometers 1,228 aser tanüngba kilometers 296 ya shinga nema menungloksüi lir ta Ministry of Road Transport and Highways (MoRTH) ajanga 2025-26 annual report nung ashi.

North-Eastern Region nung National Highways yanglutsü atema tali temulung agüja arur aser budget lemzükba nungi

shilem 10 shi NE region atema lir ta Ministry-i ashir.

Central Road and Infrastructure Fund (CRIF) Act, 2000 nung aliba ama state shia sorkari CRIF kübok mapa inyaksü renemer aser scheme ana kübok mapa kuma inyaker - CRIF (state road) aser CRIF (Setu Bandhan).

CRIF state road scheme kübok sen crore 3,600 jenjang mapa 157 tang teinyakdak lir. CRIF-Setu Bandhan scheme kübok sen 590 crore jenjang mapa 35 teinyakdak lir.

2020 nungi CRIF scheme küboki aitdaksüba Economic Importance and Inter State Connectivity scheme kübok 2020 masüdag sen 242 crore jenjang projects pezü sanction asüba tang teinyakdak lir.

State PWDs temi sen 4,804 crore jenjang lenmang tasazük kilometer 538 tang teyangludak lir.

NHAI asoshi sen 3,110 crore jenjang mapa ana, tasazük kilometer 161 tang teinyakdak lir.

NHIDCL asoshi scheme balala kübok sen 80,541 crore jenjang kilometer 2,954 talang mapa 140 tang teinyakdak lir.

Nagaland nung state PWD kübok, December 31, 2025 mapang, sen crore 555 jenjang lenmang kilometer 50 talang pezü teyangludak liasü.

CRIF kübok state lenmang tajungba kumdaksütsü asoshi sen crore 179 jenjang mapa pezü inyaker.

CRIF-SetuBandhan kübok mapa pongu, sen crore 23 jenjang apu tem yangluba

mapang lir aser Economic Importance and Inter State Connectivity (EI and ISC) scheme kübok sen crore 242 jenjang mapa pezü teinyakdak lir.

December 31, 2025 mapang NHIDCL kübok sen 5,406 crore jenjang lenmang kilometer 315 ayimjema terenlok mapa 17 teinyakdak liasü.

NHIDCL kübok April 1, 2025 nungi December 31, 2025 tsüngta project 17 agütsüba nung Assam sülen timtiba jenjang tanabuba nung Nagaland liasü, koba sen crore 136 jenjang kilometer 15 awajemba projects pezü alitsü ta Ministry ajanga ashi.

Assam nung aliba Kamakhya Temple aser Arunachal Pradesh nung aliba Tawang nung projects tem asoshi tejangja asameyangba mapang lir ta report nung ashi.

State governments den teka amteper Parvatmala Pariyojana kübok ropeway project inyaksü atema Assam, Tripura, Nagaland aser Arunachal Pradesh state sorkar tem den Memorandums of Understanding (MoU) zülutepogo.

April 2025 nungi December

2025 tashinung state shia national permit fee lemsatsüba nung Nagaland nem sen 1,58,86,220 agütsüogo.

Kasa mapang state shai nem All India Tourist Permit lema agütsüba nung Nagaland asoshi 18,70,082 liasü.

NHIDCL ajanga Akegwo nungi Avangkhu section 2-laning ulushiba mapa inyaker, kobai Nagaland ajanga NER tesem balala Myanmar den sendakteptsü, ta report nung ashi.

Iba project lenmang ya nüburtem asoshi March 2026 tashinung lapoktsütsü ta ashi.

Ajisüaka NHIDCL ajanga Package-II atema physical progress osang agütsüba nung senotsü shilem 41 aser mapa inyaka aliba shilem 49 lir. Package III atema physical progress shilem 85 aser financial progress shilem 84, aser Package I atema physical progress shilem 85 aser financial progress shilem 81.

Iba mapa ya shidakba nung February 23, 2026 nung renemtsü liasü, saka June aser July tashinung ang renemtsü amai lir, ta Ministry ajanga ashi.

Ochi mashi inyakyim atema Rahul Gandhi-i CM Sarma aitsü

Guwahati, Rongchii/April 5 (Agencies): Assam Assembly elections agitsü lia Congress lenir aser Lok Sabha nung Opposition lenir Rahul Gandhi-i Deobarnü Chief Minister Himanta Biswa Sarma aitsüogo aser ashiba agi, pai lokti lemdangtsü meranger.

Biswanath nung nüboyimba sentong ka nung o jembiba mapang Gandhi-i, Sarma ya linük nung chief minister tem rongnung ajak dang ochi meshiteiba ta ashiba den nüburttem yongtsü nung tsükchitep adokdaksüba atema pa aija liasü. Paisa, Sarma lenisüba nung Assam nung lenirtemi telongjem melena tesempatep prokshir, ta ashi.

Gandhi-i, Congress-i sorkar kümtetra aibelenertem anema temzüng ozüing dak ajemdaker jenjang tesashi agitsü ta tekümdangtsü metetdaksüogo. Paisa, ajak obendangtsü aser Chief Minister-ia taoba mapang inyakyimtem atema nüburttem nem telangzüba agütsütsüsa akümtsü, ta ashi.

Gandhi-i ashiba agi, Assam nung rongnung nungi sobaliba tsütsü nüngtugu nisung Mahapurush Srimanta Sankardeva, Bharat Ratna Bhupen Hazarika, Gopinath Bordoloi, Azan Fakir, taoba CM Tarun Gogoi, aser kentener Zubeen Garg indang jemi aser parnok ya telongjem temaitsü lir ta ashi.

Maneni Gandhi-isa, Assam amala kin balala temeyoktep aliba state ka nung ajak tesunep nung alitsüji kanga dang tongtibang lir ta ashi. Pai, state tashi ya temeyoktep lokti, oshi aser arok tejangraba aser nükjidong nungi arur, ta ashi.

Rongsenketzüng nung policy tem indang jembiba mapang Gandhi-i, local tem akoksadaksür corporate kar ajangzükdaksüba atema sorkar aija liasü. Pai ashiba agi, Assam nung alirtem dang nungi ali agir aser item ya shishilembaba telok balala nem agütsür, aser iba ajanga Assam ya nisung kar atema tajangzük akadak tesem ka akümer. Iba

dak sendakba nung paiAto Kilonser Narendra Modi aser Home Minister Amit Shah na aija liasü.

Süngolu nung inyakeritem atema tenangzükba indang jembiba mapang Gandhi-i ashiba agi, Congress indang manifesto nung anogoshia taah sen 450 agütsütsüba aser kin trok nem Scheduled Tribe jenjang agütsütsü sentong lir. Paisa, taoba sorkari nangzükba mataloktsüi süitemogo, ta ashi.

Gandhi-i anogo asemtsüingda Assam anaben semdangogo. April 2 nü pai Karbi Anglong nung Congress candidate Raton Engti atema nübo yimja liasü, kong pai lisopurtem nem tashi tali agütsütsü nangzüka liasü. Gandhi-i Article 244(A) benoktsü nangzük.

Pai sentepa aliba lokti dang Article 244(A) benokba sülen Karbi Anglong nung aliba nüburttemi parnok inyakyim asoshi telemteba agitsü. Tanga kin nungi shingaiya nenok aliba tesem nung tashi mamshitetsü, ta ashi.

Meghalaya nung constituency 60 atema SIR agitsü

Shillong, Rongchii/April 5 (Agencies): Meghalaya nung electoral rolls atema Special Intensive Revision (SIR) ka agitsü renemdar, aser Election Commission of India nungi official mapanglem atadar, ta ketdangtsür tejen kati ashi.

Chief Electoral Officer Brahma Deo Ram Tiwari-i ashiba agi, official osang agütsüba sülen iba revision yagi assembly constituency 60 prongla ayimjemtsü. SIR ya kibongshiai tua voter list jangjashitsü asoshi lir.

Ketdangtsürtemisa temsüa malirtem mesüra lisopur masürtem list nungi agintsü atema voter tem asoba tesem amala osang tejangja agitsü aser tanga kuli kakettep asadangtsü.

Meghalaya nung lokti tentet balalai iba inyakyim ya benoka inyaksü nongshia arudar, aser talisa taruba Garo Hills

Autonomous District Council (GHADC) elections magi tsüingda benoktsü takhangba agütsüdar. March ita Garo Hills nung mepetmesü adokba sülen Confederation of Meghalaya Social Organisations (CoMSO)-i, roll lepa reprangshitsü ayongzükogo.

CoMSO-i, Union Home Minister Amit Shah aser Chief Election Commissioner Gyanesh Kumar dangi shiti yokogo. Parnoki chichiba India nungertem dang voter list-i idaktsütsü aser lisopurtem tejangraba kümzüka toktsütsü mepeshia metetdaksüogo.

Kasa mapang nung Chief Minister Conrad Sangma-ia iba inyakyim pusema jembioigo aser state sorkari Centre aser Election Commission naprongla den sendaktepa inyakdar ta ashi.

Booth Level Officers (BLOs) temi voter tem osang

tejangja agitsüba atema ki ajak semdanga aotsü. Voter tem ya arishi küm aser parnok tsürapurtem 2005 rolls nung aliba dak ajemdaker category pezü küma lemsatsü. Category ajak atema temsüa ali mali jangjatsü asoshi iba dak sendakba kuli kakete lemsateptsü nungdaksü.

Tawa rationalisation sülen Meghalaya nung polling station 3,615 lir, kong tasen 64 densema lir.

Kasa mapang nung Shillong Lok Sabha by-election atema-a renemshi tenzükogo. MP Ricky Andrew Jones Syngkon February 19 nü asüba sülen election agitsüsa kümogo. Pa futsal asayaba mapang temulungja mapa minyaki küma asü.

By-election nung Voice of the People Party (VPP) tenüng nungi tokteptsü asoshi Batskhem Myrboh shimogo.

Meghalaya: KSU indang Sngi Kyrswiew Ri rally nung long agi ontep

Shillong, Rongchii/April 05 (Agencies): Khasi Students' Union's (KSU) küm shia Laban nung amungba ama April 4 nü Laban nung Sngi Kyrswiew Ri amungdang long agi ontepa khen iba sentong nung timtem ajurua liasü.

KSU züingsemtem yimdong süa jajaba mapang anasa aliba ki ka nungi mejangjaba nisungtemi long agi aon, ta tenük kuli alirtemi ashi. Iba sentong nung shilem agir kari meyiper long agi ona liasü.

Ajisüaka district ketdangtsür aser KSU lenirtem tetsüingtai aita atsüanem akatsü ajungshia tensa tamajungba mekumdaksüi aziök. Iba sülen mapang talangka melie yimdong süa jaja aser iba sülen timtem atalokba meliasü aser nisung yiruba osanga mali.

Khen timtem ajuruaka Khasi National Awakening Day ama amungba Sngi Kyrswiew Ri sentong ya tejangraba tulu nung munga liasü. Iba yimdong süa

jajaba sentong ya Laban nung aliba Bharat Scouts & Guides tesem nungi tenzüka Shillong Vidyalaya Secondary School, Lumshatsngi tashi ao.

Shilem agirtemi Tirot Sing Syiem, U Kiang Nangbah, Ka Phan Nonglait aser Wickliff Syiem densema Khasi-Jaintia nüchiso meshir tejangja indang noksa tem bener yimyim ayima jaja liasü.

Iba sentong nung KSU lenir Lambokstarwell Marngar aser Donald V. Thabah nungera liasü aser ano state tesem balala nungi iba sentong nung shilem agitsü nisung adenshia liasü.

Iba anogo Laban nung kanga azüingmeyaka liasü, kong dokan tem shibang aser yokya-yokchir tema meliasü aser security personnel aika liasü.

Sngi Kyrswiew Ri ya küm shia KSU-i amunger, koba Khasi kin sobaliba aser yimdenren asendenshiba mapang ka amai aser par maitsü aser senmang wazüka ayuba sentong ka amai lir.

Tripura: BJP-i TTAADC poll nung territorial council nangzük

Khumulwng, Rongchii/April 05 (Agencies): Deobarnü Bharatiya Janata Party (BJP)-i Tripura Tribal Areas Autonomous District Council (TTAADC) elections atema 29-point manifesto sayaogo, kong tang aliba council ya territorial body kumdakba constitution tsütsü temeden tali agütsütsü nangzük.

"Sankalpa Patra" ya Chief Minister Manik Saha aser state BJP tir Rajib Bhattacharjee na lia saya, aser yangji tribal nisungtem aliba tesemtem nung administrative yanglushitsü, terenlok maparen aser nüburttemi ajangzüktsü sentong nung rangloker proposals lemsatepa lir.

Party lenir Rebatu Tripura-i ashiba agi, Tripura Autonomous Territorial Council yagi socio-economic development tashi itsütsü, customary practices wazüka ayutsü aser Kokborok densema tribal oshitem temaba jenjangi ajungkettsü.

Manifesto nung tongtipang tenangzükba tem rongnung Dhalai district nung medical college ka amenoktsü aser Khumulwng nung nursing aser paramedical institute ka lapoktsü dena lir. Iba manifesto nungya Village Committee areas nung rural market infrastructure tuluba kumtsütsü, office facilities tajungba kumdaksütsü, democratic yimya nung Village Committees shimtsü aser akhi mapang nungi amshia aruba tzüzüng ozüing wazüka ayutsü dena lir.

BJP-i zones ajunga nung handloom aser handicrafts atema training centres

amenoktsü, self-help groups ajungkettsü aser tribal tsür atema sen aruba lenmang tajungba kumdaksütsü indanga shia lir. Parnoki süngkum agi yangluba osettsüset aser südakba atema centres balaka lapoktsütsü indanga shia lir.

Saisapong aser sobaliba tsütsü manifesto nungya football academy aser martial arts training centre yanglutsütsü, traditional medicinal practices temabai ajungkettsü aser Khumulwng atema comprehensive development plant ka renemtsü nangzüka lir.

Parnoki electrification, piped drinking water aser solar lighting temADC areas ajunga nung inoktsütsü nangzüka lir. Lanurtem yaritsü atema skill development programmes aser start-up, Pradhan Mantri Awas Yojana kübok kisüba nung teyari aser tzülü ayimer yaritsü nükjidong lir.

Osangbener den jembidang, ADC areas nung 2018 nungi terenlok lir, kong lenmang tesendaktep nung terenlok lira ser Jal Jeevan Mission kübok tajemtsü tzü agütsüba nunga terenlok lir, ta Saha-i ashi.

"Territorial council ya amenokra, iba yagi constitutional safeguards aser teyari tali bener arutsü," ta pai ashi.

Council nung ochimashi lir ta tai tonglojka aliba onük nung telangzüba agütsüdag, party yimsüsüba mendeni arura onoki aibelener tem merenshitsü aser tang kari teka amoshitsü merangra ibaji autonomous body nung teka amoshir ama asütsü, ta Chief Minister-i ashi.



Assam Chief Minister Himanta Biswa Sarma-i April 5 nü ashiba agi, Congress lenir Pawan Khera-i pa kinungtsü Riniki Bhuyan anema taittsüba balala benokba ya aitsüogo aser pai police nem ken o bushisüingdangdaksütsü asoshi formal tashishiba ka benoktsü.



April 05, 2026 nü Nadia district nung Kaliganj constituency nungi TMC candidate, Alifa Ahmed-i West Bengal Assembly election atema nüboyimdang teka ayiploksüba noksa nung angur.

TMC-i Delhi election nung tokteptsü: Mamata

Kolkata, April 05 (Agencies): Malda nung election sentong ka nung jembidang West Bengal Chief Minister aser Trinamool Congress tongti Mamata Banerjee-i, 2026 küm Centre nung BJP sorkar chireptsü, ta ashi.

Laisa, BJP-i Bengal anema inyaker; onoki taruba Delhi election nung tokteptsü atema renemdar, ta metetdaksü.

"2026 küm Delhi nung BJP sorkar chireptsü. Parnoki Bengal nung rangloker; onoki Delhi nung rangloksü," ta lai metetdaksü.

Mamata Banerjee-isa, Union Home Minister Amit Shah-i Murshidabad nung votes agiener aser state

ketdangsertem transfer yoker, ta ashi.

"Ni Amit Shah dang yangi lokti senden ka ayongzüka akatsü aser voters agienba indang jembitsü jazüker. Na iba linük nung Home Minister lir aser nai Murshidabad nung Muslim nung votes agientsü atema phone ajanga tetuyuba agütsür. Kü constituency nunga votes agienogo. Yamai nai takok angutsü asü? State pongu nung elections agir; ketdangser 506 transfer sütsüogo, aser iba nungjagi ketdangser 485 bo Bengal kija nung lir. Iba atema mangyangang ta ni nüburtem dang ashitsü," ta lai metetdaksü.

Anepdang Manikchak nung nüboyim sentong ka nung Mamata Banerjee-i, "Nenoki taruba küm pongu tesünap nung linüra BJP nokdangtsü atema nenok longjemtsüla. BJP-i iba linük raksatsütsü. Parnoki yimsü kecha akhüm metsübur. Parnoki parnok sasa yangluba yimsü ka benoker. Maa Kali indang prasad nung ango aser shi naprongla densema lir. BJP-i koba ama yimsü ka benokner. Parnoki tamasa Bengal nung sobaliba angatetsüla," ta ashi.

West Bengal Assembly nung elections shilem ana lemsar April 23 aser April 29 anogotem nung agitsü aser May 4 nü vote azüingtsü.

UP nung tebilemstsü tulutibaji mapa manguba ya lir: AAP

Hathras, April 05 (Agencies): Amongnü Aam Aadmi Party (AAP)-i "Rozgar Do, Samajik Nyay Do" yimiyim kübok tetsüing agi longkak aita jajaa Hathras yimti tongogo.

AAP-i, Centre sorkari mapa manguba, shisaliok aser loktiliba nung temeden ama tongtibang onüktem sendoker, ta metetdaksü.

April 3 nungi tenzüka state tesem ajaklen longkak aita jajaba sentong ya Rajya Sabha MP aser AAP Uttar Pradesh in-charge, Sanjay Singh leniba nung agir, aser iba sentong ya April 9 nü Mathura nung tembangtsü.

Hathras nung osangbenertem den jembidang Singh-i BJP aser Ato kilonser Narendra Modi aija, tongtibang tebilemstsü onüktem bentettsü atema inyaksü melen parnok

kin aser tamangba yimsü nung ajemdaker telemsa proker, ta metetdaksü.

Iba sentong agiba tongtibangba nukjidongji mapa manguba tebilemstsü aser telemsa adokdaksüba politics anema lir, ta pai metetdaksü.

"Uttar Pradesh nung mapa manguba lanurtem tarensen talang nokdaka lir," ta pai ashi.

Paisa, University of Allahabad, University of Lucknow, Aligarh Muslim University aser Dr Bhimrao Ambedkar University nungi graduate asüba lanurtem mapa mangur aser parnok mapa akhangba mapang nung police-i parnok dak tashiyim amshir, ta metetdaksü.

Uttar Pradesh nung Asha workers, anganwadi workers aser 'shiksha mitras'-i regularisation atema longkak

aita arur aser aluyimertemi senotsü tsütsü timtem ajangshir, ta pai ashi.

Uttar Pradesh nung tebilemstsü tulutibaji mapa manguba tebilemstsü ya lir, ta shia Singh-i, AAP-i "Mapa agüjang mesüra ita shia unemployment allowance sen 10,000 agüjang" ta yimiyim ayimer, ta metetdaksü.

Loktiliba nung ochi temeden maliba dak sendakba nung Singh-i, kin mesüra yimsü nung ajemdaker nüburtem bendanga züngshiba ya anentsüla, ta ashi.

Ato kilonser aija Singh-i, tawa Modi-i Kerala semdangba mapang nung pai shisaliok, healthcare, Digital India, Make in India, black money, rupee sen jenjang tajungba akümtsü mesüra sorochocka gas agi anüingba indang kecha mejembi, ta metetdaksü.

Iran nungi ano India nung 348 Chennai yimti tonga aruogo

Chennai, Rongchii/April 05 (Agencies): Tang rara aliba Iran linük nungi India nung 348 Chennai yimti tonga aruogo; India nungertemji teimbaka Tamil Nadu nungi lir aser kar kidanger state tem nungi lir, ta ketdangsertemi metetdaksü.

Armenia nungi apusoba tayimtsüji Indian embassy-i anepalutsüba liasü.

Passenger 348 nungjagi parnok 327 Tamil nungertem liasü, Puducherry nungi parnok pongu aser Kerala nungi parnok 10 liasü.

Tamil nungertemji teimbaka Tirunelveli, Kanyakumari aser Nagapattinam district tem nungi liasü. Parnok ya Iran nung angopurtem lir.

Tayimtsüji Chennai yimti tonga aruba mapang nung tayimtsü anendak Union Minister Piyush Goyal aser Tamil Nadu BJP Tir, Nainar Nagenthran nati parnok agizüka liasü, iba sülen special bus ajanga peipei jilai yoka liasü.

Kanyakumari nungi arrshi küm 46, Peter Blacian-i, "Anogo shia amai bomb ola ajanga

tesüiba ita ka tashi onok amoi junga mouteti liasü. Onoki ajangshibatemi rasa-a ashitsü kanga tasak. Onoki teimla samar liasü," ta metetdaksü.

Peter Blacian den tangar nisung 22 ji team ka ama Bandar Abbas kübok Kish asetkong nung angopurtem liasü.

Rara tenzüka sülen parnok nem mapa agütsürtemi parnok nem chiyungtsü agüja liasü, ajisüaka parnok ghonda 18 tashi bus ajanga Qom yimtii aotsü atemabo parnok sasa dang achaayanga liasü. Iba yimti nungji Indian embassy ketdangsertemi parnok agizüka liasü.

Kanyakumari nungi arrshi küm 34, Aneesh Raja-i, "Iba yimti nungji Indian embassy-i onok kanga junga anepalua onok nem chiyungtsü aser tanendak agütsü, iba sülen Julfar ajanga Armenia-i ao," ta metetdaksü.

Aneesh Raja bo ita asem tejaklen ang Iran-i oa liasü, ajisüaka kobi melii rara tenzüka ajanga timtem kanga ajangshiba sülen kidangi meyipa aruogo.

Bengal nung BJP-i CM candidate mesangdongtsü: Bhattacharya

Kolkata, Rongchii/April 05 (Agencies): West Bengal assembly election atema BJP-i chief minister candidate tenüing sangdongtsüa akok ta aikati imlaa liasü, ajisüaka Amongnü West Bengal BJP Tir, Samik Bhattacharya-i, iba dak sendakba nung party-i telemtetba magi, ajisüaka party-i Ato kilonser Narendra Modi tenüing aser pai terenlok mapa inyaksüba tenüing nung tokteptsü, ta metetdaksü.

Bhattacharya-i, iba assembly election ya BJP-i indangindanga Chief Minister Mamata Banerjee aser TMC indang temesüzükba politics anema raraba tongbang ka lir, ta ashi.

Bhattacharya-i, BJP-i Chief Minister candidate mesangdongtsü saka Modi tenüing aser pa indang terenlok onük nung ajemdaker tokteptsü, ta metetdaksü.

Paisa, BJP-i takok ngura state nung ozüing alema arua aliba bendangertem maitsü jangjatsü, aputsü aser meindoktsü, ta metetdaksü.

Interview ka nung Bhattacharya dang, BJP-i assembly nung Opposition lenir Suvendu Adhikari menden anaprong- Nandigram aser Bhabanipur nungi toktepdaksütsü atema telemtetba agiba ya pa chief minister candidate asüba agi asü? ta asüingdang, ajisüaka pai indangindanga telangzüba magütsü.



"BJP-i chief minister candidate mesangdonger. Delhi aser Haryana nunga BJP-i kar CM candidate sangdong asü? Onoki mesangdong, ajisüaka onoki takok nguogo. Odisha nunga yamaji atalok. Item elections nung onoki kar tenüing sangdonga metoktep," ta pai ashi.

Bhattacharya-isa, CM ji party parliamentary board aser central lenirtemi shimtsü, ta ashi.

"Onoki elections nung terenlok agütsüsang Ato kilonser Narendra Modi tenüing nung tokteper. Kashmir nungi tenzüka Kanyakumari tashi nung nüburtemi pa dak tamang kateter," ta state BJP Tirisa metetdaksü.



Nehru Stadium nung Soldierathon Delhi 2026 Half Marathon sentong ayongzüka agidang tangokba noksa nung angur. Iba sentong ya Punjab National Bank-i ayongzüka.



TIR YIMYIM YIMOBILEM (EDITRIAL)

DIMAPUR MONDAY, APRIL (RONGCHII) 06, 2026

Leperi Pa makok!

Alima nung tamangba yimsü tapu aika lir. Item rongnung tongtibang yimsü kar - Hinduism, Buddhism, Islam, Jainism, Judaism, Sikhism, Taoism, Zoroastrianism, Confucianism, Deism, Shamanism aser Shinto lir. Alima tesem balala nung item yimsü amanger nisung aika dang lir. Aji oda süaka item yimsü ajak dang kangasa balaka asüba yimsübaji Yisui sayuba yimsü (Christianity) ya lir. Kechiba Christianity ya tanga yimsütem dang nungi balaka ta süra, iba yimsü bener arusang yabo alima nung meimchir ka ama asü aser leper nung arem aji saka shia aru. Tanga tamangba yimsü ngutetter nisungtem ama Yisu Khrista ya-a noklang shilem nung noklang nisung meimchir ka liasü, aji saka ano Pa yasa noklang shilem nung noklang Tsüngrem liasü. Anungji tanga yimsü den kodang Christianity aser iba yimsü bener arusang Yisu naji medemdangdir, tanga yimsü ngutetter nisungtem den Yisu Khrista ya kenyongi balaka angutsü. Tanga yimsü ngutettertemjia Yisu ama nisung liasü, saka item nisungtemji sür shia aruba otsü nung mali. Ashitsü agi küm meyi ana shi tejaklen Yihuda nungertemi Yisu Khrista kangki nung tepsetter külen tasemnübuba nung shia aru ta asüba otsüji alima ajak nung tesüngmangtsü osang ka liasü. Aben jagiang Yisu anemertemi Yisu shia aruba otsüji miimbanga ayutsü asoshi iba osangji tiyazü, Pa temangji leper nungi Yisu nütsüngtemi bener oadok ta jembia osang sangdong meso, saka aji oda Yisu Khrista atangji nung shiba Tsüngrem liasü, Pa ali shi nung meimchir ama kümer iba lima nung aliba mapang Pai 'ni sür tasemnübuba nung shia arutsü' ta tejangja shir liasü asünungji, Yisu anemertemi olulu sangdongba osang jagi Yisu shia aruba otsüji nembanga meyutsütet. Yisu alima nung nütsüngtem den aliba mapang Pai parnok dang Pa sür shia arutsü ta tejangja shir liakasa, mezüngbo Pa nütsüngtemia Yisu shia arubaji mamangtetba otsü nung asenoki angur. Kechiba mezüngbo Pa nütsüngtemia süng tamang mekatet süra, tasüba aser leper-i mokoki tasemnübuba nung Pa shia arubaji alima tsütsü nungibo tesüngmangtsü rongnung tesungmangtsu ka liasü. Asen kümteba Yisu Khrista ya teshinem menemba leperi kokteta tasü nungi shia maru ka asübo Yisu-i sayuba yimsü yaa tanga yimsütem den kecha balaka tepila melila. Kechiba süra tangar yimsütem nungjia azüzüktepa, meimtepa aser ochishia alitsübaji sayur. Saka Khristantem asoshi ajak dang tematiba osang tajungbaji, ali shi temang ya süadoker külen ano teti taküm akatsü asoshi Yisui meimchir menen alangzüka kangki nung Pa taküm bendanga agütsüba ajanga tekümtet agütsüogo. Anungji Yisui sayuba ama shidak benshia ochishia alirtembo ali shi temang ya süadoker külena ano mesamaba kotak nung Pa den teti tepeladak alitsü. Leperi Yisu mokoki shia aruba dangji Easter ta ajar, kenü anogo Yisu o bendangtsü asoshi alimai arudang pa dak ochishia amangertem ajak Yisu ama leper nungi shia arutsü aser Pa den mepet langbang nung ayipa atutsü. Küm meyi ana shi tejaklen Yisu shia arur kotaki tuogo, ibaji bilemtetba mong asenoki Easter Sunday mongogo; aser Pa dak tsüngchia amangertemi rapture mapang Yisu ama shia arubaji ajangshitsü aser tatem maka tepeladak Kotak nung Pa den alitsü. Teti tatem makadak Pa den alitsü nukla yur, leperi makoksang Yisu dak amangertemi mapang ajak nung meshiteta bendanga agüja, alima nung liaka alima meyong makümi, Tsüngrem meima mapa tajung tejang tangdakja Yisu dak tera ayangtsü aser pa den jajatsü aser tatem nung Yisu shia aruba ainji agizüktettsüsa Pai asenok lidaktsüner.

OLEMSABANG

TEMBAR ANA OTSÜ

- K. Moatoshi

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

Ken mapang ka nung Nokju sanger Yim Ka nung tembar tajung ana liasü. Konangba Yimdak takartiba, nupensor jabaso aser Aremzüksang Kijasor meshi mejong sensaker kibong nung soa intet. Tembar ana ya mozü ka agi asütsü ama meimtepba yaritepba lia aru. Tena kipa kiyimtsü mapang tonga aru nung kibong akümtsü pangjemtep. Konangba takar jabaso aser jetpera teyakyak asü nung yimtak nuknurar jenti liasü. Anungji par tsüraburi takar jala ka yimti aser alu talen ajak ramoka ayala, Yimtiyala, yimtak tebor tajungtila pa kinungtsü asütsü aniasünga toktsü. Konangbar takar yimso yimtir nupensor asü nung tsürapur mapang sung lung külemba mapang kika suchi benjong tulu ayongzük medem yimer tang masü temeket yimtsüngtem nungi tsürapur akang tempartem ajak jatena, ali ajak atemshia benjong tulu ayongzük. Yimtak kibong shia shijeb lemstsü aser yimer ajak anogo ana asem tashi chiyongdakja chirnur semchir semnur tashi otsü sutsüsa konangpar tsürapuri kiyir benjong tulu keptettsü.

Aremzüksang-a tepur tajung aso ajen tesetep asü nung pa nukshir tetsür aika liasü, saka sensakerchir asüba agi tetsür tsürapuri pa den lidaktsütsü memelung. Tatem sa yimtak sensaker jala ka tsürapuri aniasüngtsü. Saka iba sensaker jala ya loktiliba Arogo ren nung shilem tajung agiba aser wainshin aketba jala tajung ka liasü. Khu o khu na, chi o chi na sa atongteperji tena ani kilen tesetep ajuruteper. Tenabo sensaker kibong nungi asü nung kiyir benjong-a mayongzük Bothbar aonung ka sentepnung kiyimba kulizüng kakat tang agizüka kibongji tenzük.

Tembar anaji küm ka ita ka nung külem kibong kemer mepu ka nung kishinentepba ali. Tena kiyimlu achitsü asoshi alu süi ao aser mesong tajungba ka lepteta tempur anaji iba luji zükdanga arr sua achi. Kirip anaji jangratema yangyuteperba luti luji inyak. Iba kümji mongpu ajungba agi yimer tem ajak tsük sung ongsung asü. Alu nung züngi menti aser moko mersu kanga atang aser tsük-a jenti aru. Tembar anaji alu rua yimtak jendang tsük penteta rizünga yur kinungtsü ana numongtsü mapang atong. Konangbarbo rongsen akaba kibong asünung jila mozü ki tajungtiba bushia oa numong among, tebur chanu ka soa pener yimtaki shilang. Aremzüksang kinungtsü po kidang yimtak tantsür nuso yarirtem nem dang anepalua sodaktsü. Sensaker dang sa Tsüngremi meimerji pa kinungtsü nuso temelala mekangshie dang tebur ka aso.

Tembar anaji tepur kaka sotsüji pelaseta kinungtsü ana nu pentsü dang tena alu nung yipa yangyuteperba maipu/ penji septetta aluji yaritepba inyak. Aluji ali onsara ajungba agi kümsem pentsü tena septetta aluji inyak. Konangba nem Tsüngremi jabaso ana aser jala ana moatsü. Chirnur tem ajak tekolok tajung tesa asünung ajak tajung kümdaktsütsü nukla tulu nung pai tanürtem ajak Kohima nung tulus takar tem chir azüngba school tajung ka nung züngdaktsü. Tanürtem nungdakba ajak peritsüa tim mendemdaktsü. Yimtak konangba takarba yimten, Arogo aser lokti ajak pa meteni kecha mesuteter. Temetetba aser rongsen kitsüng nunga pa atoksar shinga mali. Ken o tetangshi tsüngro tasong, o yim metetba lenir ka, anungji yimten Arogo maparen ajak nung bendang palala len pai dang anir jaja nung yimer lokti ajak pa kapu nung ama liasü. Loktiliba ajak pa supok nung yur kibur sua pa sunutsü sua lia aru. Par chinur mesura par pusemer aser kinunger temi temzüng alema aibelen dang odang mangu amai dang toktsütsü aser yimer tanger-i aipelen dangpo senchi tulu achitsü, temzüngji pa amshi-nulen amshia supokrem agia yimsusur tem-a aiben timtim dakja pa sunetsü sua aru. Iba amaji meimchir dang asü nung pa dak tashi mait jenti liasü. Lokti nung pa takitsü tera danga melira ken o nung tepang meyitsü, pai bilemba lokti-i magizükra item maparen nung pa matentsü, pa tang nungi tajungba lenir adokra tarak ka mekettsü tashi arishitsü, lokti nung pa tang nungi Tsüngro tasongba mesura ken o tajungba jembiteter dak mokokachitsü. Loktiliba ajak pai mulungba nung dang anishia aru. Par nupensor aser rongsen tulu akaba nisung anungji yimtak pa pusemer teimba aküm nung kanga ngasangatema mezümeküma yimtak pa mesemi asüküma kanga aintsü tenzük. Yimtak terenlok atema aruba sen ajak par senbongi ai. Terenlok mapa po kecha meinyaki sena jak pai chimatsü. Tantsür tampur asoshi sorkari agatsüba senji-a pai sa meimzüka agitsü yimtak tepezük tia nung alirtem aser lajar tem asoshi teyari aruba rongsen ajakji par meyong aküm. Yimertemi pa mapa tamajung meteta kibok kibok nungpo nemnemteper saka koya senteper tsüngtsüng azüktsür maliba ama pa anema nokdaker mali asü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

KBPF-i ayongzüka Easter Sunrise tekülem agi



Kohima, April 05, 2026: Amongnü Khuochiezie (Kohima Local Ground) nung Khristantemi Easter tekülem sentong agidang tangokba noksa nung angur. Iba sentong ya Kohima Baptist Pastors' Fellowship (KBPF)-i ayongzüka liasü.

Kohima, Rongchii/April 05 (TYO): Amongnü Easter anogomong nung denomination aser Arogo balala nungi Khristantem Khuochiezie (Kohima Local Ground) nung adenshia Yisu Khrista shia aruba Sunrise Service tekülem sentong agiogo.

Iba sentong ya Kohima Baptist Pastors' Fellowship (KBPF)-i ayongzüka liasü.

Tsüngrem O jembidang KBPF Tir, Rev. Ruokuovilie Sachu-i tamangertem dang pei tamang jenjang manokshii alitsü ayongzüka liasü.

Rev. Sachu-i, Yisu Khrista tasü nungi shia aruba ya temenen aser tasü madak takok anguba temaitsü lir, aser ya Khristan tamang tamendakdak lir, ta ashi.

Paisa, Khrista timtemba aser Kangki nung metaba ya atangji, aser iba ya meimchirtem temenen nungi alanzüktsü atema lir, ta metetdaksü.

"Yimtenren, loktiliba aser tanela tsütsülen nungi Khristantem tamang kanga atidanger, aser ibaji ajanga lenirtema aika Khristan tesayuba nungi pilatsüsa akümer," ta pai ashi.

Iba dak sendakba nung pai tamangertem dang, tenüng agi dang Khristan ka masü saka anogo shia pei libaliro ajanga Khristan ka ama alitsü ayongzüka.

"Yisuji dang lenmang, atangji aser taküm. Tanü kija-kibongtem aser loktiliba nung timtem balala atema telangzübaji Khrista dang lir," ta pai ashi.

Khrista asüba aser shia aruba ajanga meimchirtem Tsüngrem den sendakteptsü, taitok agütsü aser tatem maka taküm teimla agütsü, ta pai ashi.

Tsüngremer taochiji kanga tulu, anungji tatok mangutsüsa temenen tulu kecha mali, ta paisa metetdaksü.

Rev. Sachu-i tamangertem

dang temenen nungi meyiptsü, Tsüngrem dangi meyiptsü aser Yisu Khristaji pei taküm nung Kibur aser Kümtetdakba ta agizüktsüla, kechiyong tamangertem ajak atema tekümtet lir, ta ashi.

Iba sentong ya KBPF tatong Tir, Wongtokiu leniba nung agi, Rongmei Baptist Arogo nung pastor Jenthailung Kamei aser Bethel Masiha Arogo nung pastor, Narayan nati Tejen Lai aser Tasen Lai nungi Lai azüing.

Kohima Lotha Baptist Arogo nung senior pastor Rev. Dr Benry Lotha-i sentong tenzüka sarasadem aser Konyak Baptist Arogo nung pastor, Rev. M. Nahngom-i sentong tembanga sarasadema liasü.

Kasa sentong nung Kohima Phom Baptist Church choir aser Sumi Baptist Church Kohima choir nati ken aten.

Sentong nung laktii "Tanü Yisu Shia Aru" aser "Khrista shia aru" ken tena liasü.

Yirusalem nung Arogo lenirtemi yimjung alitsü ayongzüker



April 05, 2026: Easter anogomong nung Yirusalem nung Arogo lenirtemi Israel aser Middle East nung yimjung osang sangoktsüba den külemi tamangertem dang Yisu Khrista dak dang imlatsü ayongzüka.

Tang Middle East nung rara aliba atema tejashi lemsatepa Arogo nung lenirtemi, Easter atongtsü hopta ishika lia rara tenzüka ajanga region tesem ajaklen tasüba, timtemba aser rongsenkettzüng tsütsü timtem tulu ajangshia lir, ta metetdaksü.

Iba rara ajanga Temeshi Lima tesem ajaklen tammang lir; iba rara ya Yirusalem aser Gaza nungi Lebanon tashi prokshio.

Arogo nung lenirtemi, tang iba ama tejashi liaka iba ya teti

atema masü, ta ashi.

Yisu Khrista tasü nungi shia aruba dak sendakba nung Arogo nung lenirtemi, Easter ya ajanga tasü madak takok anguba sangdonger, aser Khrista tasü nungi shia aruba ajanga tamangertem nem teimla agütsü, ta metetdaksü.

"Tang iba ama rara aliba tensa mapang ka nung onoki tamangertem aser alima tesem balala nung aliba Khristantem den iba ama tajungshiba Easter osang lemsateper. Kechiyong Tsüngrem sentsüwangshi ajanga Khrista tasü nungi shia arudaksüba ama asenokia taküm tasen nung jajatsü (Rom 6:4)," ta Yirusalem nung lenirtemisa metetdaksü.

"Tamangertemi sarasadema dang masü saka lenirtem dang iba azü-tokshi anentsü aser rara aliba tesem ajaklen yimjung atema ayimdensüla," ta parnoki metetdaksü.

Taoba Amongnü Palm Sunday anogomong nung Pope Leo-ia, Yisu ya 'Yimjung Chuba' aser Pai rara anemer, ta metetdakja liasü.

Pope Leo-i, "Khristai rara ayongertem sarasadema ola mangar, saka sendoker," ta shia azü tokshitsü atema Yisu tenüng tetshiba aija liasü.

Pope-i, tangartemi noklangnok aser süngsü amshiba mapang nung Yisuibo ajemalua liasü, ta ashi.

Isaia 1:15 metetdakja Pope Leo-i, pei teka nung azü alirtem sarasademji Kibubai sendoker, ta metetdakja liasü.

Tang Middle East nung rara ajanga Israel, Iran aser Lebanon densema linük aika nung rara aliba ajanga Temeshi hopta (Palm Sunday nungi Easter anogo tashi) nung Khristantemi sentong aika thinena liasü; Palm Sunday nungbo Yirusalem nung aliba Holy Sepulchre Tenla ki-a shibanga liasü.

ANOGO ABEN TSÜNGREM DEN

Tebelem

Nenok tebelemer aser khu reta abener ajak Kü dangi arung, aser Ni nenok nem anisüngzük agütsüdi. Nenoki kü süngra nung apuang aser nenoki nenok tanela asoshi anisüngzük angutsü. Mathi 11:28-29.

Nai Khrista yimsü nungji belemadokra, ne tashi atsüsepra, na tesendaktep nung pelaa alir masü, nai yimsü amshir. Yisui Pa den tesendaktepi ne tanela nem anisüngzük bener arutsütsü ta ashi. Nai Kibuba den jajaba nung na belema makümtsü, iba yagi ne nem tashi agütsütsü aser ne taküm küm kuma kümdaktsütsü.

Mapa meranga inyakba mesüra junga memejangba agi na belema kümdaktsür. Iba tani tebelemji anisüngzük junga agiba ajanga tashi tasen angutsü akok. Saka idakji shi temang atena oa belemba tebilemba ka lir. Idaki nunga atua bilemba (emotion) tebelem ka lir. Tangar nüngdak asoshi khuret abenba nung belemba tebelem ka lir. Anisüngzüktsü asoshi nai sodi agitsü akok saka sodi jagi tanela belemba nung anisüngzük agütsütsü makok. Khrista nung anisüngzükba ajanga dang ibai shidak kümdaktsütsü akok.

Tejangra Khristan kari Khrista tenzüksü asoshi parnoki inyaktsü akokba ajak inyaktsü meranger aser teinyakdak nung parnok sasa aniadoker. Parnok nem Yisui Pa dangi orr angazüktsü tajaba agütsü. Yisu alima nung alidang pa mapang nüngdaka alir telok den indok. Pai Pa anemertem ajurur, Pai aonung tepiyonga sarasadem aser Pai Pa kija ken ken dang ali. Aji saka Pai teti Tebu nungi aruba anisüngzük aser tashi agi. Iba tetezü Yisui mapa meinyak ta masü saka Pai tanelaren anisüngzük angulenji metetta liasü. Na belema lir asü ? Yisu dangi oang aser Pai ne nem Pa anisüngzük agütsüdakjang. Pa anisüngzükji Kechaia magütsütetba anisüngzük ne tanela nem agütsütsü.

Goa nunga tamangertemi Easter among

Panaji, April 05 (Agencies): Amongnü India nunga tesem ajaklen Khristantemi Easter anogomong nung sentong balala ayongzüka agiogo; ano state kar nungbo Honibar ayaterm nungi Easter sentong jelia tenzüka liasü.

Amongnü Goa nunga tesem ajaklen Arogotem nung Yisu Khrista tanaben shia aruba anogomong nung sentong balala ayongzüka agiogo.

Old Goa nung akhidang asüba Tenla kitem nungi tenzüka Salcete aser Bardez nung aliba Tenla kitem tashi nung ayaterm nungi tenzüka anepong tashi tamangertem meyrjang aika adenshia tekülem sentong agi.

Arogotem nung putirtemi YisuKhrista ajanga teimla tasen agütsüba osang lemsatepba den külemi temeim alitsü aser asentenshir taküm tasen alitsü ayongzüka liasü.

Goa Governor Pusapati Ashok Gajapathi Raju aser Chief Minister, Pramod Sawant natia Goa nung tamangertem den Easter salem lemsatepa liasü.

Goa Angh, Raju-i, Easter ya teimla, taküm tasen aser timtem nungi takok anguba temaitsü lir, ta metetdaksü.

Raju-i, Easter ya Yisu Khrista tasü nungi shia aruba benjungmong lir, ta shia loktiliba nung yimjung atema temeim alitsü, tai tokteptsü aser tamang akatsü ayongzüka.

Chief minister-i, Easter ya tasen tenzüka aser adianu tsüngda temeimtep benjung lir, ta shia Khristantem den Easter salem lemsatep.

Iba benjungmong ajanga tamang aser teimla osang abener, anungji nüburttem rongnung temeim alitsü aser tenzükteptsüla, ta Chief Minister-i ayongzüka.

AO OSHI ANGAZÜKDAK:

TANÜ ANGAZÜKTSÜBA OJANG



Waramung

(n) temang nung wara komo tarak (scars of epidemic)
* Yaksü wara agi shirangba tarak waramung nisung aika dak keta lir.

Waro

(n) ozü tulu aser sentsü tanak (crow)
* Asen lima nungbo waro ozü dena maru kümogo.

OLONG PAITEP # 7465

	1			2	3			
4			5					6
					7			
	8							
	9			10			11	
						12		13
14								
						15		

TIPILEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungtsümapangsüadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. _____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 7464 TELANGZÜBA

TIPILEN :

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket,
- 14. Mangu, 15. Anünü, 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Sүjak, 10. Aonung,
- 11. Dokan, 13. Tinu.

NAI-A YA METETTER



Alima nung tar talangtisang Sultan Kösen indang documentary tasen ka April 8, 2026 nü United States nung TLC nung sayutsü. Kasa documentary ya United Kingdom nunga May 4 nü Channel 4 nung sayutsü.

2009 küm Turkey nung Sultan Kösen indang tar 8 ft 1 in (246.5 cm) asateta "world's tallest man and overall tallest person" naroküm nguteta Guinness World Records ICON ka aküm. Iba sülen pa tar maneni inlok aser tang 8 ft 2.8 in (251 cm) lir.

CPI(M) den sendaktepitemi Tripura CM meketbanga lir



Agartala, April 5, 2026 (Agencies): Tripura Chief Minister Manik Saha ya CPI(M) nung political careers tenzükertem aser iba sülen maongka bushia BJP nung adenertemi longbanga lir ta Tipra Motha Party founder aser chuba jabaso Pradyot Kishore Debbarma-i ashi.

Manik Saha ya "anti-Tiprasa" ama repranger ta Debbarma-i ashi.

TTAADC elections nung Kanchanpur nung Tipra Motha candidate atema nüboyimba sentong ka nung pai iba ya ashi.

"BJP lennir ajakbo majung masü. BJP nung lennir aikati tensa kanga junga meteta lir aser asen tebilemstütem angateta lir. Saka asenoki akhümtsübuba Chief Minister ya taoba nung CPI(M) den alirtemi meketbanga lir. Parnok ya BJP nung aden. Iba

jagi Chief Minister-i CPI(M) anema masü saka Tiprasa anema jembir" ta Debbarma-isa metetdaksü.

"Chief Minister-i pa indang political career nung tayongzüka chichiba majurudang. Tiprasa nung ajaki pa anema noktakbaji tang mezüngbuba lir. Ni mezüngmeshiyonga arur aser tangbo ni ya yiar ta jemi. April 12 nü Tiprasa nungeri item asoshi telangzüba agütsütsü" ta paisa ashi.

"Parnoki nenok nem süpokrem agütsütsü merangtsü. Iba ajanga nür chirmur tarutsü teraksadaksüma. Nenoki sen meshia agira aser nenok votes agütsüra, nenok taruba küm pungu atema sensaka dang yutsütsü" ta Debbarma-isa ashi.

"Tang ya nenoki aibelenertem putettsüla. Parnok dang kechiba water connectivity majung ta

asüngdangang, parnok dang shisaliok tajung agütsütsü ateam sen kechiba magütsür ta asüngdangang. Parnok dang nür tanurtem asoshi kechi sentong lir ta asüngdangang" ta paisa ayongzüka.

Tipra Motha-i TTAADC elections nung tamakok ngura lisopurtem kümzüka ayubatem samatsü ta Debbarma-isa shisem.

"Bru settlement anema noktaktertem nenoki mamadoktsüla. Parnoki Biswajit Debbarma tepset. Kasa tashitemi dang Parameshwar Reang aser Pindalal Chakra na tepset. Item tatalokba atema nisung shinga pua maru kechiyong parnok tekümüzkertem liasü. Künü anogo Tiprasa longjemtsü aser asen yimsüsüba amenoktsü" ta Debbarma-isa metetdaksü.

Assam sorkari LPG distributors 5 mapa anentsür

Guwahati, April 5, 2026 (Agencies): Assam sorkari LPG distributors pungu mapa anentsüogo aser iba ya parnoki distribution nung tim mesüi inyakba atema lir.

West Asia nung tensa ajurua aliba aser Centre sorkari tetuyuba agütsüba ama LPG supplies nung mita reprangba sülen iba mapa inyaker ta Assam Chief Secretary office-i metetdaksüogo.

Oil Marketing Companies den külemi supply shitak agütsütsü atema ketdangsrtemi LPG

distributors maparen meyipa reprangshia liasü.

Sorkari anentsüba distributor temji- Tezpur nung B.M. Gas Service, Biswanath Charali nung Biswanath Gas Distributor, Dhubri nung Gadadhar Gas Service, Howly (Barpeta) nung K.A. Indane Gramin Vitrak aser Hojai nung Prakash Indane Agency lir.

Item agency dangi LPG supplies yokba anenogo aser tanga tetuyuba ka magütsü tashi Supply Planning and Distribution (SPD) system

kübok parnok nem magütsütsü. Item distributors den sendaktepa aliba consumers tim metemdaksütsü asoshi tanga agencies lemzüksüogo.

Assam nung LPG peria dang lir aser domestic consumers-i full allocation angur ta sorkari metetdaksüogo.

Assam nung essential commodities alemba nung tim masüba magizüksü aser tang meyipa reprangshiba sülen ano mapa inyaktsü ta sorkarisa metetdaksüogo.

Manipur CM Khemchand-i Jiribam district semdang



Imphal, April 5, 2026 (Agencies): State sorkari healthcare services meyipa reprangshir medical staff atema transfer policy ka renemtsü ta Manipur Chief Minister Yumnam Khemchand Singh-i ashi.

Chief Minister Khemchand-i Honibarnü Jiribam district semdangba sülen iba osang metetdaksü.

Honibarnü pai Ningshingkhul nung Jiri District Hospital semdang aser idakji infrastructure, service delivery aser staffing asadanga liasü.

Jiri District Hospital nung services nung temulung asü saka nübo peria mali anungji iba tebilemstü asoshi inyaktsü. Maneni doctors' quarters tajungba akümtsü ta Chief Minister Khemchand-i ashi.

Paisa Leingangpokpi police outpost semdang aser idangji district nung law and order tensa reprangba den terenlok nüngdakba indang meyipa reprangshi.

Honibarnü state BJP president A. Sharda Devi aser BJP MLA temi CM Khemchand meiner senzü.

Sorkari yimjung bener arutsü, kin balala tsüngda tesentaktep akangshitsü aser lisopur sobaliba kümzüka yua ajak asoshi terenlok bener arutsü tenangzüka agia lir ta CM Khemchand-i ashi.

Union Home Minister Amit Shah aser Manipur Governor Ajay Kumar Bhalla den senden amenba sülen CM Khemchand-i anogo asemnü atema Jiribam district semdang.

Yumnam Khemchand Singh-i February 4, 2026 nü Chief Minister inyaktsü tezüngzüktep agia liasü.

Ukraine-i Primorsk aser Nizhny Novgorod amak



Moscow, Metsüremi/ March 5 (Agencies): Ukraine nunger indang drone temi Russia kübok Baltic tziyimkü nung amendaker aliba Primorsk yimti aser central Nizhny Novgorod region nung NORSI oil refinery makogo, ta Ukraine drone forces commander Robert Brovdi-i ashi.

Iba tesem ana amakba ya Russia nunger ketdangsürtemi Deobar anepdang tamasa metetdakja liasü.

Russia kübok northwestern Leningrad region governor Alexander Drozdenko-i ashiba agi, Primorsk nung pipeline ka raksaogo, koba Russia indang totzü export asüba tesem tongtiba ka lir. Iba sülen mapang tatsüka lir paisa Telegram ajanga, port nung totzü bendenba reservoir ka osettsüt teraksa agi kongshiba sülen leak süa liasü, ta ashi.

Nizhny Novgorod nung Governor Gleb Nikitin-i

ashiba agi, NORSI oil refinery, nung mi adoka liasü. Iba refinery ya Russia nung refinery tulutiba rongnung pezübuba lir. Paisa, iba plant nung facility ana dak kongshia liasü, ta ashi.

Pai, power station ka aser ki aika raksaogo, ajisüaka nisung asüba mesüra yiruba osangbo kecha mali, ta metetdaksü.

Primorsk koba Finnish arrtsü aser St Petersburg na tsüngda lir, iba tesem ya March ita nunga makogo aser iba mapang totzü bendendak ka nung mi adoka liasü.

Iba rongnendak ya Russia indang totzü shibelenba company Transneft-i bendangleni totsü bener aotsü atema amshir.

NORSI, koba Russia nung petrol producer tulutibatam rongnung tanabuba lir, idaki küm nung totzü metric ton million 16 process asür, koba anogo nung barrel 320,000 shi asütsü. Ukraine amaktsü atema Moscow nem rongsen

agütsüba source tajemba kümdaktsütsü atema Ukraine-i tawa Russia indang oil infrastructure tem maka arudar.

Taoba ita mapang ka nung Ukraine-i amakba aser Ukraine nung Druzhba pipeline shibangba aser Russia den sendaka aliba rongtem apuba ajanga Russia indang totzü shibelenba tashi shilem 40 agi ajema liasü.

Russia aser Ukraine na rara tembangdaksütsü atema sensaksem ita ishika bangdaka lir.

Rara tembangdaksütsü atema United States, Russia aser Ukraine nunger taküm Abu Dhabi aser Geneva nung asemben tashi sensaksemogo. Ajisüaka Ukraine anütoklen ali atsüngsüba indang tongtibang ken o sensaksem tongpoka bener motetei anena lir.

Sensaksem pezübuba taoba ita agitsü liasü, saka US aser Israel na tang Iran den rara aliba ajanga thinena liasü.

APOLOGY STATEMENT

Mr. MENANGNOCHET S/o I. PANGER LONGCHAR village CHUNGTIAYIMSEN Mokokchung, admit the following to Khensa Senso Mungdang on this day the 4th day of April 2026.

1. I edited the video with the caption, "After Mass Declaration of Candidate for the the upcoming 28 Koridang AC Bye-Election at Khensa village, Mokokchung".
2. That the video which I have edited, captioned and uploaded in different Social Media Platforms was faulty, misleading and defamatory in general and for the citizens of Khensa village in particular.
3. My libel action have marred the good objective of 'Mass Declaration of 28 Koridang AC Bye-Election', programme organized by Khensa Senso Mungdang on 28/03/2026.

I therefore tender my sincere apologies to Khensa Senso Mungdang and to all those who have been harmed by my faulty viral video.

(Signature)
04/04/26
MENANGNOCHET

Serbia & Hungary na sendaktepba gas pipeline ka anasa bomb ngutet

Belgrade, Rongchii/April 5 (Agencies): Serbia nunger ketdangsürtemi Deobarnü Serbia aser Hungary na sendaktepba gas pipeline ka anasa bomb toktsür aliba ngutetogo, aser bushisüngdang tenzükogo, ta metetdaksü.

Serbia tir Aleksandar Vucic-i ashiba agi, army aser police unit temi detonator dena bomb talep ana northern Serbia kübok Kanjiza nung iba pipeline nungi meter noklang ishika dang pilar nguteta liasü.

Vucic-i ashiba agi, item bomb tem yagi teraksatsüba tulu bener arutsüla. Paisa, iba ajanga nisung taküm aika lendongi idaktsüla aser facility kanga mejungi raksatsüla ta ashi.

Serbia tir-isa, iba osang ya Hungaria Ato Kilonser Viktor Orban nem agütsüogo. "Onok unit temi bomb tesashi ka ngutetogo," ta Vucic-i Instagram nung zülutsü. "Ni PM Orban dang onoki ken o maneni metetdakja alitsü ta

shiogo," ta paisa shisem.

Kasa mapang nung Orban-i Facebook nung post ka ajanga ashiba agi, pai defence council senden ka ayongzüka menogo aser pipeline dak sendakba nung Vucic den phone ajanga jembiogo. Iba pipeline yagi Russia indang natural gas Balkan ajanga Europe teyongtsü aser anütokleni bener aoer.

Tang tashi nung iba bomb toktsüba ya telok kati danga nangzüka mali aser kechiba toktsü mejangja, saka Vucic-i ashiba agi, Serbia nunger itdangitertemi ken o karbo kaktetogo, saka tangbo shia matatetsü.

Balkan Stream pipeline ya TurkStream network atsülangshiba ka lir, koba Russia nunger indang gas Serbia aser Hungary nati bener aotsü atema tongtibang lenmang ka lir. Serbia ya Russia indang gas aser totzü dak metaloker alir, aser anogoshia gas cubic metre million trok shi shishilembadak jenjang tesadang shia agi abener.

Bangladesh nung measles agi tanur 98 takum samatsüogo



Dhaka, Rongchii/April 05 (Agencies): Bangladesh nung tesüiba hopta asem tsüngta measles südi ta temulung melemteti aliba tashidak ajanga tanur 98 takum samatsüogo ta Deobarnü sorkar data nung sayua liasü aser tesashitiba kongshia aliba tesemtem nung Dhaka-i vaccination agütsütsü meranga inyaker.

Nüngdakba ama telangzüba agütsütsü asoshi taoba hopta

Ato Kilonser Tarique Rahman-i minister ana dang nisung million 170 aliba South Asia linük tesem balala sema jajatsü totuyuba agüja liasü.

Health ministry ajanga data ka Deobarnü sayaba nung tanur arishi ita trok nungi küm pongu tsüngta measles symptoms südi ta temulung melemteti shiranga aliba 6,476 jungogo ta ashir.

"Tesüiba küm tem den medemdangra, iba tashidak agi

tanurtem dak kongshiba takum timba aser tasüba timba lir," ta Communicable Disease Control nung director Halimur Rashid-i ashi.

Suspected cases timtiba ya 2005 küm liasü (25,935), ta World Health Organization (WHO) data ajanga ashir, saka taküm tashi kanga tajemba nung liasü. Vaccine tem agi anüngba densema tensa balala ajanga iba wara ya poktet südi ta Rashid-i ashi.

Demographic stand nung measles cases tejangja 826 aser tasüba 16 dang lir, aser mongin temi metendanger mesüra metendang tsüngta shiranger asür ta ashir.

Measles ya alima nung timtiba menatepba aoba tashidak ka lir aser iba tashidak ya nisung ka aketdang mesüra hajidang menateper, ta WHO-i ashir.

Iba tashidak ya nisung mashi

ka dak kongshitsü akok, saka tanur dak timba adoker aser iba yagi tekolok awakba aser tango sashiba nung timtem tulu agütsüba densema temang nung timtem balala adokdaksütsü.

Bangladesh nung menatepa aoba tashidak azüoktsü atema vaccination tsütsü terenlok kanga lir, saka Sheikh Hasina sorkar lapodakja 2024 küm June ita lanur temi anir longkak aitba ajanga measles drive ka tenzüktsü aliba menudaktsü.

Bangladesh nung tanur timba ita toku nung vaccine ka agir, ajisüaka tang tesüsa poktetba agi meneper ya timba ita trok purtem lir ta ketdangsür temi ashir.

National Verification Committee of Measles and Rubella indang tekolak Mahmudur Rahman-i ashiba agi, parnoki December 2025 tashinung iba tashidak ajanga samatsütsü tebilemba liasü saka vaccination

programmes majungba ajanga takok mongutet.

Dhaka-i region nung iba tashidak timtiba aliba tesem 30 jangjaogo aser vaccination programme ka tenzükogo.

Tesem balalai maodang tamajungtiba kongshir aliba tesemtem nung vaccination drive agitsü, ta Health Minister Sardar Shakhawat Hossain Bakul-i ashi.

Taoba mapang Expanded Programme on Immunisation (EPI) nung ketdangsür aser public health expert Tajul Islam A Bari-i ashiba agi, vaccine alitsü sen lezmüktsü saka ketdangsür temi malitet.

Küm shia alima nung measles agi nisung 95,000 asür aser timba vaccine magi mesüra abensa magiba tanur arishi küm pongu kübok alirtem lir, ta WHO-i asadangteta lir.

Measles agi meneperba sülen anepalutsü yimya tejangja mali.

Taoba mapang Chelsea nungi asayar Oscar asaya nungi anener



Rongchii/April 5, 2026 (Agencies): Taoba mapang Chelsea aser Brazil nunger midfielder Oscar temang nung timtem aliba ajanga arishi kum 34buba nung football asaya nungi anener.

Oscar dak vasovagal syncope tashidak putet. Iba tashidak yagi pa ajungbena heart rate aser blood pressure ajema kumdaktsür aser iba ajanga

temulungjang nung timtema doker. Taoba kum pa São Paulo atema training agiba mapang minute ana süjia oa liasü.

Oscar Chelsea nungi 200 ben dak tema asayaogo aser iba mapang goal 38 idaktsü aser Club-i UEFA Europa League (2013) aser Premier League (2014/15, 2016/17) akokba nung teyari tulu agüja liasü. Ano pa 2011 nungi 2015 kum

tsüingda Brazil team nungi 48ben asayaogo aser iba mapang pai goal 12 idakja liasü. Pa kum asem atema tenangzüktepba yanglur São Paulo nung oa aden saka pa tang club indang fan ka ama dang shilem agitettsü.

"Kü temulungjang minute ana ser tesadang anena liasü; iba ya taoksatsüka liasü," ta Oscar-i Honibarnü social media ajanga ashi. "Tanübo ni tajungba kumogo aser iba indang jembitetet, kechiyong taoba mapangbo ni iba indang mejembiteti liasü. Ni tetedangba agi aser iba mapang süjia ao, kü blood pressure kanga ajema akum aser kü temulungjang anena liasü. Parnoki minute ana dak tema ni mesotsü atema CPR agüja liasü. Ni ni süjia aoba dak alaka kecha mebilemteper," ta paisa shisem.

"Ajaki na asütsü mapang nung nai nü temang toktsür ta ashir aser nia ibala mesükbaji ka ajangshia liasü. Na süjia oatoker saka pungmang tajung ka nung ama liasü. Item ya kanga kara ataloker aser ni kü jabasoi kü dang meyipa arutsü ajaba angu. Ni São Paulo atema asaysünüa liasü, saka iba ya atalokba sülen ni asaya nungi anener. Ni fan ka ama kü taküm maneni liyonga aotsü," ta Oscar-i ashi.

AIFF election ita 3 menor agitsü FIFA-i mulunga agizükogo

Rongchii/April 5, 2026 (Agencies): Alima nung football asaya achaayangba lokti tentet FIFA-i, All India Football Federation (AIFF) dang election September ita agitsü aliba December itai belener aoba asoshi kecha tashishiba mali ta shiogo.

AIFF tir Kalyan Chaubey ya 2022 kum September 2 nü kum pezü atema shim. Election ya term madem tsüingda agitsü liasü, saka National Sports Governance Act 2025 benokba sülen AIFF-i FIFA dang India nung football asaya kecha tetsükdaktsü makai achaayangtsü asoshi menden ya taküm kum tatemlenang melenteptsü nungdaka lir ta metetdaktsüogo.

"2025 kum December 22 nü youth affairs and sports-i sangdong ka ajanga NSGA den sendakteptsü asoshi national sports federations ajak structural temelenshi indang osang ka metetdaktsüogo. NSGA provision tem sülen anidaktsü atema ministry of youth affairs and sports-i kum tom nung election agitsü aliba

national sports federation tem nem khen atema mapang atsülangtsü temelaba agütsüogo, aser iba ajanga federation tem nem December 31 tashi election agitsü lenmang lapoktsüogo," ta AIFF deputy secretary general M Satyanarayan-i taoba ita FIFA aser AFC dangi yokba shiti nung shia lir.

FIFA-i ashiba agi, parnoki kecha ashishia mali aser iba inyakyim benoka inyakba tepeyong AIFF nongita yaritsü mulunga aliba lemsatepogo.

"Onoki nenok dang FIFA aser AFC nem AIFF constitution amendment inyakyim nung jenjang talila agiba indang metetdakja alitsü mepeshir," ta FIFA nung associations governance services manager Emile Doms-i taoba hopta federation dangi yokba shiti nung shia lir.

Kasa mapang nung AIFF-i parnok kübok züingoka alirtem dang parnok constitutional document tem 2026 kum June 30 nü tashi nungbo amendment adopt asüba tembanga inyaktsü shiogo.

World Para Archery: Vijay Sundi gold medal angu



Rongchii/April 5, 2026 (Agencies): Jharkhand aser linük asoshi konang tetushi bener aruja India nunger para archer Vijay Sundi-i, World Para Archery Series 2026 Leg-1 nung tebur recurve team asaya nung gold medal nguogo.

Bangkok nung tang asaya aliba iba tetushi asayamung nung India tenüing nungi tang mezüingbuba asayaba mapang Sundi den pa indang teammate

Harvinder Singh nati final nung Chinese Taipei nunger tarep 6-2 agi koka gold medal angu.

Iba asayamung ya March 29 nü tenzük aser April 5 nü tashi asayatsü.

Sundi-i maneni kanga junga asaya-a pai tarep temeyoktep asaya nunga takok tajung nguogo. Bhavna den longiemer asayaba mapang tenati Slovenia den kanga toktepba asayar bronze medal ngua liasü.

Bronze medal atema asaya ya 4-4 nung tembangba sülen shoot-off ka asaya, kong India nunger tarep yagi point 10.9 angu aser Slovenia nunger tarep yagi 9.8 ngua liasü.

Iba asaya nung Sundi-i kanga junga asayaogo. Pai mezüingbuba 70-meter round nung point 323 angu aser tanabuba nung 318 ngua pa indang points ajak senteper 641 liasü, aser iba ajanga pa iba series nung temaba jenjang nung aliba asayar kumogo.

Sundi-i iba asaya akokba sülen Sikursai, Chaibasa kübok Turtung Archery Training Centre nung pa indang coach aser külem trainees tem kanga pelatepa liasü.

Pa indang coach Maharshi Mahendra Sinku-i ashiba agi, archery nung takok angutsü atema discipline asütsüla aser kanga meranga inyaktsü nungdaker.

Paisa, Sundi-i asaya dak rangloker aliba aser pa indang shooting technique ajungba indang tenüingsanga jemi, aser pa yakta India tenüing nungi Asian Para Games aser Paralympics amala asayamung tulutem nung shilem agitsü ta temulung lema bilemba lemsatep.

Kishane Thompson-i 150m asemtepba nung otsü tasen yanglu

Rongchii/April 5, 2026 (Agencies): Olympic aser world 100m silver medallist Kishane Thompson-i Florida nung Miramar Invitational asayamung nung 150m asemtepba nung alizüing 14.92 seconds (1.3 m/s) nung tongteta regulation track nung otsü tasen ka yangluogo.

Iba record ya 1994 kum Linford Christie-i yanglur liasü. Iba mapang Christie-i 14.97 second nung alizüing tongteta liasü.

150m asemtepba nung Thompson dang nungi takaraba alizüing atongertem lir, saka itemji straight tracks nung asayaba mapang lir, anungji Thompson ya standard curved-track conditions nung alizüing takaratiba atongba asayar kumogo.

Thompson shiba taküm world indoor 60m asemtepba nung runner-up liasü, pai iba asemtepba ya ayong ayonga dang asema liasü.

Temetettsükaji nungtugu asemteper Usain Bolt-i 150m asemtepba nung alizüing (14.35

seconds) takaratiba tongteta lir, saka aji straight track ka nung liasü. 2009 kum Manchester nung asayaba mapang pai iba record yanglua liasü. Ajisiüka curved-track asemtepba nungbo Thompson ya temaba jenjang nung lir.

Zimbabwe nunger Tapiwanashe Makarawu-i line tonga Thompson nongshia asem aser pai alizüing 14.96 second nung tongteta pa tanabuba jenjang nung tembang.

Tetsür 150m asemtepba Tia Clayton-i akok. Lai alizüing second 16.87 (1.4 m/s) nung atong aser la sülen tanabuba jenjang nung külem Jamaica tsür Briana Williams (16.92) aser tasembuba nung la jakreper Tina Clayton (17.00) liasü.

100m asemtepba Ackeem Blake-i (9.84) akok aser Tate Taylor (9.95) aser Rohan Watson (9.99) na tanabuba aser tasembuba jenjang nung liasü.

Maneni mixed 4x100m relay-a Jamaica team-i akok. Parnoki 41.24 second nung alizüing tongteta liasü.

BILEMDANGANG

"Tamang agi tamakoktsü ajak kokteta aoer."